

# A Tribute to Aden Abdille Osman

---

Abwaan Mahamad Gaal Haayoow

Afrikana nin doorka u dhashee dib u xusuus dheere  
Yay ku dagan dabeylaha is baddala door ku soo maraye  
Dadku kugu yaboohaad siddeed duhur dharaareede  
Dusha ku xiji yaan damac hunguri daaqad kaa ridine  
Dadaal muuji duul baraka qaba waa u darartahe  
Dallacaadda iimaanka iyo laabta daahirahe  
Daa'in kugu yaboohaa danbigi daafta kaa mariye.

Door shariifahaad uga jirtaa dulucda taariikhde  
Diiwaanka qarankana ku qoran dacalka koobaade  
Dadka iyo dalkaba waxaa anfaca geesi daacadahe  
Damaashaadka Luuliyo bishii loo dabbaaldegayay  
Bishii laysku daray labadii calan dayaxi soo baxaye  
Dubka saarnaye Aadan Cabdullaan dayro ka imaane  
Daldallaansi baa jiray ragbaa dacar abuuraaye.

Dagaal laguma dayin doorashay uga lib dooneene  
Markow todobo daw oo is xigay deyr walbo u jiray  
Gobannimadi lagu diirsadoow deebta ka afuufay  
Haddii doonnigoow waday nin kale dacaygi loo dhiibe  
Daadka raacay dibutaatiyaal diiddan baa helaye  
Doorashadi ku dhacay waa ka degay siima dabageline  
Dadaalkiisi waa loo darsaday waana dagi wayday  
Dariiqaan rabnaan mari jirnaya nabad ku daanyoosho  
Gabbalkeedi goortow dam yiri waa la kala dudaye.

Darajiyo ammaan nimaan lahayn uma ducaynayne  
Daryeelkaadi Aadan Cabdulloow inaan ku deelqaafne  
Ku dudurinne doqonkaaba oge doobbogoray weeye  
Dibusocod dabbiyo xeel bartaye jeelka kuu diraya  
Kii ka daba dukaayiyo asagu wax isma doorshaane  
Afrikana wax u daran ma'oga iyo waxuu danehe  
Daa'inkaan wixii laga dalbado deyn ku jirihayne  
Dallaallaale iyo caafimaad inow ku deeqsiiyo  
Dinbidhaafna kuu raaciyaa duco sokeeyaahe  
Diintaad ku kala duwan tihii duqa Mandeellahe  
Dadnimadase ways kala egtihiin libin u doodkaahe.

Dacwo furan nin doorkaan dibdhigin dowga ku habboone  
Damiinkaan waxgaran looma diro xaajo dalableeye  
Nin doolaalo dheer doonbirkow dabin ku arkaahe  
Dalka u-gaara Aadan Cabdulliyo duulka kala haysta  
Diiwaanka Unadoow ku qoray damac nin waayeele  
Aqoon lagu dabbaqay waa dugsigi macallinka kuu doore  
Darsigiisa kuu meeriye qalin dawaaddiisu  
Daruurta u egtahay kuugu qoraad dib ugu aaydaahe  
Dagaalyahanka Aadan Cabdullaa howl ku-dayasho lehe  
Dadka lagu dawaadshoow na baray waa la daafmaraye.

Dalka Xamar, Daafeed iyo Cigo daginka Boosaaso  
Dooloow iyo Wajeer iyo ku dare daginka Ceelwaaqe  
Dooxada Lughayiyo dushaan Saaxil ka aqaanno  
Damalse buur ku yaal geedahow ugu da'weyn yahaye  
Daafaha Wajaalana dadkii aniga igu hayste  
Daandaansi igu maagayee hawadu doojayso  
Dabeyshana ku liitoow intaan doontu kula ciirin  
Soo dardaaran tiri Aadanoow duubay gogoshiye  
Duq ribeeyay doqon quursataa waa ku dagantaah  
Dakaddaa Jabuutina Diggool inow ku daanshoodo  
Dib u hayst Aadan Cabdulloow kaama daadagine.

Gabar timaha dabataye xarrago doc ula liiceeyda  
Duuduubna laysugu tidcaye deelka loo simaye  
Hadday dagato duudkiyo garbaha daah u noqonayda  
Daymo aragtideedana sidii ubaxi deyreede  
Ku diirsaday cadceed kulul u egee baal dillaacsadaye

Oon dagdagine duunyada markay subax dareeraydo  
Dooxa roob ku da'ay iyo markay dahan ku oodqaadde  
Doog iyo naq lagu soofiyeey darar ka maashaahe  
Hadday darata haaydiyo haddii weer dugdhabadeeyo  
Gabar diris u haasaaw taqaan kama difaacdeene  
Darrooriyo Awaariyo degmaday ariga daajaydo  
Dadka kama dhexeydee dalkay joogto anigaa leh  
Dooddeeda Aadan Cabdullaa daaqadda u furaye  
Dushaan kala wareege iska daa waa war doqoneede.

Doonniga hartiya owr dikane dabar ku seetaysan  
Ee dowda loo wabax naqee duhato jiilaala  
Afar gocayo loo kala dajiye wiil dibjira dhaansho  
Doobbadana labo daan ka ridee biyaha daabbulaya  
Degmadoow ka guuxiyo dalkoow joogo anigaa leh  
Afrikana wax iiguma darroo diinta iyo dhaqanka  
Duulaan isugu soo dhawaan dumarna kala guursan  
Dagalkiisa nimaan sheega karin iyo dadka u jooga  
Dufu waa ku taal dabo kurteed loogu darimaah  
Nin-door waaye Aadan Cabdullee wayska daafmaraye.

Dugsi macallimoow leeyahaye inow ka diinqaado  
Dadaalkiisu nimoow seejiyee doorasho u taagan  
Ayadoo dahsoon Aadanoow dacayo baarkaagi  
Nin ku diimayaa maalintaa dibadda soo bixiday  
Dacayga uga bidayoo ku kacay dayro ololkeedi  
Nin-darraagu waxow soo dumeey doqontu boobtaah  
Dan how galine Aadan Cabdulloow dowladnimadeyni  
Adigoow dagaalayoo ka diray doob-candhoolihiye  
Dalluuntoow gumeysigu ku riday duhur ka-soosaare  
Daacaddii garsoorkiyo la waay dood caddaaladahe  
Dulmanuhu xaqiisii ku helay duudsan laga yeele  
Dadku kuma illoobine ducaan kugu yaboohnaah  
Daa'inkeey ha kaa wada hodmiyo labada daaroode.

AAMIIN... .AAMIIN... .AAMIIN... .AAMIIN... .AAMIIN... .